



PROXECTO DE CONVENIO DE COLABORACIÓN ENTRE A AXENCIA GALEGA DE INNOVACIÓN E A ASOCIACIÓN CLÚSTER SAÚDE DE GALICIA PARA A IMPLEMENTACIÓN DUN PLAN DE ACTIVIDADES PARA IMPULSAR A COMPETITIVIDADE, A INNOVACIÓN DO TECIDO EMPRESARIAL GALEGO NO SECTOR SAÚDE NO PERÍODO 2026-2027

MEMORIA XUSTIFICATIVA

A directora da Axencia Galega de Innovación da Consellería de Educación, Ciencia, Universidades e Formación Profesional **DECLARA:**

Que a Axencia Galega de Innovación ten previsto formalizar co Clúster Saúde de Galicia o instrumento convencional arriba referido por un período de vixencia que abrangue dende a sinatura do convenio ata o 31 de outubro de 2027.

Que o instrumento convencional ten por **obxecto:**

A realización e execución de actuacións que impulsen o papel do sector biotecnolóxico empresarial galego no eido sanitario e da saúde , así como da súa cadea de valor (universidades, centros, empresas, startups...). Deste xeito, búscase seguir potenciando o desenvolvemento da biotecnoloxía, como Tecnoloxía Facilitadora Esencial (TFE), e o apoio aos diversos sectores produtivos de Galicia, favorecendo neste caso, en concreto, o negocio do sector sanitario e da saúde.

As **actividades obxecto** do mesmo son:





1. Potenciar a capacidade de innovación do clúster e os servizos innovadores que presta aos seus asociados e ao conxunto do ecosistema biotecnolóxico de Galicia.

Dita acción consta de tres accións:

- Acción 1.1. Servizo de vixilancia tecnolóxica e de mercados para incrementar as capacidades de transferencia e dinamización do ecosistema.
- Acción 1.2 Servizo de asesoramento e soporte ao ecosistema de saúde no seu proceso de adaptación ás obrigas derivadas do regulamento de Intelixencia Artificial (e dispositivos sanitarios).
- Acción 1.3 Radar de oportunidades para o ecosistema de saúde: opcións de financiamento e participación en proxectos vinculados á saúde dixital, especialmente respecto da Intelixencia Artificial e os espazos de datos.

2. Reforzar o rol do CSG na dinamización e seguimento do subsector biotecnolóxico aplicado á saúde. Dita actuación consta de catro accións principais:

- Acción 2.1. Premios RIES.
- Acción 2.2. Presenza institucional e representación Internacional do CSG.
- Acción 2.3. Comunicación institucional, visibilidade e difusión internacional da marca "Galicia, the best way in biotechnology"
- Acción 2.4. Capacidades técnicas e operativas para o soporte das iniciativas do CSG no eido biotech-saúde e IA aplicada.

Que existe converxencia de intereses entre as entidades asinantes en orde á consecución do obxecto referido.

Que o instrumento convencional que se pretende asinar se **fundamenta** no seguinte:





1. Que a entidade CSG, constituída ao amparo da Lei Orgánica 1/2002, do 22 de marzo, reguladora do dereito de asociación, é unha asociación sen ánimo de lucro de ámbito territorial na Comunidade autónoma de Galicia, dotada con personalidade xurídica propia e plena capacidade de obrar de acordo coa lexislación vixente sobre asociacións (Núm. 2011/015855 – Sección 1 do Rexistro Central de Asociacións). Segundo o artigo 5 dos seus estatutos, CSG ten como fin principal *“dinamizar a competitividade de Galicia, contribuíndo ao desenvolvemento económico e social da comunidade autónoma, a través da cooperación entre todas as institucións e empresas públicas e privadas relacionadas coa saúde e a sanidade, impulsando a excelencia empresarial no sector, agrupando a empresas, centros de investigación, entidades e institucións, para ofrecer novas oportunidades de servizos para os usuarios, tras a adquisición dun alto nivel de competitividade empresarial mediante a realización de proxectos de carácter innovador”*.
2. Que a Lei 5/2013, do 30 de maio, de fomento da investigación científica e a innovación de Galicia, ten por obxecto establecer o marco para o fomento da investigación e do desenvolvemento tecnolóxico, da transferencia e valorización de resultados e da innovación en Galicia en todas as súas vertentes, así como da súa xestión eficiente. Esta lei, no seu capítulo III, establece o Plan Galego de Investigación e Innovación como instrumento fundamental de planificación e coordinación das políticas en materia de investigación, transferencia, valorización e innovación en Galicia, e confírelle no seu artigo 15.5 a consideración de plan estratéxico de subvencións, para os efectos do establecido no artigo 5 da Lei 9/2007, do 13 de xuño, de subvencións de Galicia.

O 8 de abril de 2022, o Consello da Xunta de Galicia adoptou o acordo mediante o cal se aprobou a Estratexia de especialización intelixente (RIS3) de Galicia 2021-2027, que define o marco para as políticas de investigación e





innovación na comunidade autónoma para este período. Como instrumento de planificación operativa para a súa implementación entre 2025 e 2027, o Consello da Xunta aprobou o 3 de febreiro de 2025 o Plan galego de investigación e innovación 2025-2027.

O presente convenio enmárcase na RIS3 de Galicia 2021-2027, respondendo ao reto 3 (Modelo de vida saudable e envellecemento activo da poboación) e á prioridade 3 (Enfoque cara ás persoas). Ten como obxectivo estratéxico completar e consolidar as cadeas de valor (obxectivo estratéxico 3), integrándose, polo tanto, no programa Completa e transfere da RIS3 de Galicia 2021-2027 e no programa Colaboración estratéxica do Plan galego de investigación e innovación 2025-2027.

3. Que o Plan Galego de Investigación é o instrumento de planificación operativa da Xunta de Galicia para abordar durante o trienio 2025-2027 os retos e prioridades definidos na Estratexia de Especialización Intelixente de Galicia 2021-2027 (RIS3), o marco instrumental que estrutura todas as accións de I+D+i da Administración autonómica.

O seu obxectivo é definir os instrumentos, medidas e actuacións de apoio á I+D+i que a Xunta de Galicia implantará no período 2025-2027 e detallar os fondos públicos que se destinarán a ese fin.

A biotecnoloxía forma parte do plan como unha das apostas fundamentais da Xunta de Galicia para o novo período, constituíndo unha das catro iniciativas transversais estratéxicas, denominadas de alto impacto, que permitirán concentrar recursos e materializar apostas concretas nos ámbitos de maior oportunidade para Galicia, como é a Biotecnoloxía, tanto no eido científico como empresarial.





4. CSG responde á definición de agrupación empresarial innovadora -ou clúster- establecida no artigo 2 do Regulamento (UE) 651/2014 da Comisión, do 17 de xuño de 2014, polo que se declaran determinadas categorías de axudas compatibles co mercado interior. De acordo con isto, o clúster persegue a cooperación entre diversas institucións e empresas públicas e privadas relacionadas co sector da saúde e a sanidade en Galicia, estimulando a posta en marcha de actividades innovadoras e de novas formas de colaboración, así como o intercambio de coñecementos e a contribución efectiva á transferencia destes á industria da saúde.

Ao mesmo tempo, CSG, de acordo co artigo 1 e 2 do anexo I do devandito regulamento europeo, cumpre cos requisitos de efectivos e límites financeiros establecidos para estar considerada coma unha empresa da categoría de peme, ao ser unha asociación que exerce, de forma regular, unha actividade económica ofertada a partir dun catálogo cos seguintes servizos: servizo base de representación e consulta, servizo Kit Saúde +, servizos de internacionalización e servizos de asesoramento específico.

5. Que GAIN vén colaborando con CSG desde 2023 coa posta en marcha dun primeiro convenio que permitiu o desenvolvemento de condicións favorables para o crecemento en Galicia do talento e do emprendemento ao redor da biotecnoloxía.
6. Que o plan de colaboración proposto pola CSG para os anos 2026 e 2027 configúrase como axeitado para contribuír a acadar o concreto interese da Xunta de Galicia na promoción da biotecnoloxía no eido sanitario e da saúde e, consecuentemente, como medida idónea para complementar as actuacións que GAIN está implementando para apuntalar os avances alcanzados no sector biotecnolóxico empresarial galego. Todo isto en liña cos obxectivos e





actuacións da Estratexia de Consolidación da Biotecnoloxía e coa Estratexia de Especialización Intelixente (RIS3) de Galicia 2021-2027, e co Plan Galego de investigación e innovación 2025-2027.

7. As actividades obxecto do presente convenio teñen un custo estimado de 349.409,09 €, para o que a Axencia Galega de Innovación, concede unha subvención a fondo perdido de 250.000,00 € con cargo aos orzamentos da Comunidade Autónoma para os anos 2026 (125.000,00 €) e 2027 (125.000,00 €).

O convenio asinarase de acordo coa Orde do 11 de febreiro de 1998, pola que se regula a tramitación anticipada dos expedientes de gasto, modificada pola Orde do 27 de novembro de 2000 e pola Orde do 25 de outubro de 2001, que posibilita a tramitación anticipada dos expedientes de gasto, quedando condicionado á existencia de crédito adecuado e suficiente nos orzamentos da Comunidade Autónoma para o ano 2026.

8. Que tendo en conta as características de CSG, na súa condición de entidade integradora dos intereses do sector sanitario e da saúde de Galicia, a subscripción do presente convenio de colaboración representa o instrumento adecuado de apoio aos obxectivos estratéxicos do sector e de interese xeral pretendidos polas partes asinantes, circunstancia que determina a dificultade de promover a concorrência pública, aos efectos do establecido no artigo 15.2 da Lei 1/2016, do 18 de xaneiro, de transparencia e bo goberno, nos artigos 19.4 e 26 da Lei 9/2007, do 13 de xuño de subvencións de Galicia e no artigo 40 do Decreto 11/2009, do 8 de xaneiro, polo que se aproba o regulamento da citada Lei.





Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, de 8 de novembro, de Contratos do Sector Público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria,

A directora da Axencia Galega de Innovación

Carmen Cotelo Queijo

(Documento datado e asinado dixitalmente na marxe)

